


# nordsüdostwest

text: padi musig: berni & padi



du gisch s'kommando, schtüürsch das boot  
dur jede schturm i gröschter not  
du weisch genau, wo's meischtens duregahd  
und du seisch, wer wie was wenn afahd

du machsch mi a und löschtisch s'liecht  
ich weiss nid, wasi ohni dich miecht  
d'nacht chunnt erscht, wenn's du seisch  
und es gid nüd, wo du nid weisch

**du bisch de rägä z'mitzt im summer  
bisch so früsch wie erschte schnee  
du bisch de morge und de abigschtärn  
bisch nord, süd, oscht, wescht  
du bisch de herbstwind, wo d'blätter furtrisst, bevor de himmel brännt  
und de frühling gspür ich nur wäg dier**

du bisch de fahrplan, machsch mi tag  
hesch en antwort uf jedi frag  
du gisch mer luft, raubsch mier de schnuuf  
und jedi tür machi für dich uf

du seisch wer chunnt, du seisch was gahd  
du bisch hellwach, du bisch parat  
du bisch vo allne hie die bescht  
du gisch gärn all's und mier de rescht

und chani einisch nid bi dier si, denn fül mi einsam und elei  
du bisch mis universum, mini wält und mis dehei  
und wenn i alles müessti härägäh, nur dass i chönnti bi dier si  
denn isch mer gliich, du bisch so viel meh für mi

# wieder da

text: padi musig: markus



ich weiss no gnau, wo du hesch gseit mit üs sig's glaubs verbii  
wenn s'eintä s'ander nid vertreit söll mä's nümmä so la si

und ich weiss immer no nid wenn, dass ich dich eifach ha la gah  
doch ich weiss nid erscht sit denn, was ich verlorä ha

**und jetzt schtahni wieder da - miär hend üs lang scho nümmä xeh  
chumm, miär fönd nomal vo vorä a, vergässed was isch gscheh**

und denn hani mi la triibä bis i gwüsst ha, was i will  
und sie hed gseit, ich sölli bliibä, äs gäb hiä no so vill

doch äs isch nid eso cho, ich chumä plötzli nümmä druus  
schtatt de friedä irgendwo, hani jetzt de tüüfel im huus

**und jetzt bini wieder da - ich ha di lang scho nümmä xeh  
chumm, miär fönd nomal vo vorä a, vergässed was isch gscheh**

glaub mer, s'isch so nid plant gsi, hätt würrklich gärn no wiitergmacht  
doch dass es plötzlich eifach eso ufhört, das hätti vor jahrä no nid dänkt

guet, amix chunnt's halt gliich, chli andersch als me meint  
ha gmeint, ich sigi äntlich riich, ha irgendöppis irgendwiä verdreih

**und jetzt bini wieder da - ich ha di lang scho nümmä xeh  
chumm, miär fönd nomal vo vorä a, vergässed was isch gscheh**

# eine vo dene

text: padi musig: berni



er tued immer gärn echli agäh  
vo all dem züügs, wo är so hed  
vo dem, was är no alles wird mache  
und was är scho agschellt hed

är cha sich alles chaufe  
mit gäld, won ihm nid ghört  
är hed ä huufä deals am laufe  
weisch, sis business lauft wie gschört

**är isch eine vo dene, wo alles hed  
eine vo dene, wo alles weiss, eine vo dene, wo jede kännt  
är nimmt sich, was är will, eine vo dene weiss äs genau:  
alles hed si priis & was andri hend, das will i au**

är tueds jedem gärn verzällä  
was är als chind no nid hed gha  
me müess halt einfach wellä  
drum sig är hüt e gmachte ma

är schpilt mir falsche charte  
verlüürt nid so gärn es schpil  
muess nid uf d'fraue warte  
have fun! heisst sis ziel

**är isch eine vo dene, wo alles hed  
eine vo dene, wo alles weiss, eine vo dene, wo jede kännt  
är nimmt sich, was är will, eine vo dene weiss es genau:  
alles hed si priis & was andri chönd, das chan i au**

gitarrensolo

# mängisch

text: padi musig: berni  
*duett mit kisha*



mängisch passiert's mer eifach, dass i plötzlich a dich dänk  
was machsch du jetzt grad, wie gaht's der so und wo bisch du dehei  
diä ganz zyt hemmers guet gha, s'isch mer vorcho, wienes gschänk  
säg, hesch du no e brief vo mer oder ä foti vo üs zwei

hesch du nid zu mer gseid, bevor du gangä bisch  
dass äs au ohni mich wiitergieng und dass es besser für üs isch

doch ich hätt dir vill z'verzelle, s'isch sit denn so mängs passiert  
säg, isch alles eso cho, äs hätt mi mängisch interessiert

**wenn sich üsi wäg nümm chrüüzed, wenn miär üs nümmä gsehnd  
wenn mer üs nümm eifach träffed, will mer üs verloorä hend  
au wenn mer üs nid gönd go sueche, gfindsch mi trotzdem irgendwann  
vielleicht dänksch du mängisch au grad denn... - wien ich a dich**

d'zyt lauft immer schneller, s'isch nüd me so, wie's mal gsi isch  
d'wält hed sich verändert, will miär üs fascht vergässe hend  
s'cha doch nid si, dass alles andersch worde isch  
säg hesch's au scho ghört, dass miär nid gwüsst hend, was mer wend

au wenn's scho lang verbii isch und jetzt ändlich alles schtimmt  
da git's en speicherplatz, i miär drinn, wo mer niemmer nimmt

**wenn sich üsi wäg nümm chrüüzed, wenn miär üs nümmä gsehnd  
wenn mer üs nümm eifach träffed, will mer üs verloorä hend  
au wenn mer üs nid gönd go sueche, gfindsch mi trotzdem irgendwann  
vielleicht dänksch du mängisch au grad denn... - wien ich a dich**

doch ich hätt dir vill z'verzelle, s'isch sit denn so mängs passiert  
da git's en speicherplatz, i miär drinn - - - wo mer niemmer nimmt

# äs muess eso si

text: padi musig: berni



immer gnau denn, wenn meinsch, es laufi grad so guet nach plan  
de chunnt de hammer, lauft usem rueder oder äs haut di us de bahn

immer genau denn, wenn glaubsch, dä scheiss ziech jetzt einisch a der verbii  
stecksch villicht übermorn scho bis under bede arme drin  
und du fragsch dich wieso das so isch

**hesch es no nid kapiert - dass nid nur diär das passiert**  
**äs gahd wieder verbii**  
**und falls es dich interessiert - das ha nid ich arrangiert**  
**äs muess eso si**

immer gnau denn, wenn d'muesch, denn gaht's nid und du verschtah's nid  
wenn dich ändlich denn a öppis gwöhnt hesch, cha's morn scho andersch si

immer gnau das, wott d'wetsch, ja, das chasch nid ha, das isch für anderi da  
und wenn du vill gäld gwunnä hesch, wett plötzlich jede öppis vo dem ha  
und du fragsch dich wieso das so isch

**hesch es no nid kapiert - dass nid nur diär das passiert**  
**s'gahd wieder verbii**  
**und falls es dich interessiert - das ha nid ich arrangiert**  
**äs muess eso si - das muess eso si**

wenn's nid vorwärts gahd - nid ganz rund lauft  
du uf em schluuch schtahsch - wie nä esel vor em bärg  
und nüm wiiter weisch - no kei lösing hesch  
laufschi wieder komplett näb em wäg denn fragsch dich wieso das so isch

# gnueg wyt wäg

text: padi musig: bernhard



ha de bättel scho mängisch anegrüehrt, i ha tobed, i ha gfluecht  
ha mi gärn i versuechig gfuehrt & scho mängisch alls verfluecht

& wenn's im läbä öppis gratis git, denn sägi vil, wo gar nid schtimmt  
& wenn mä's merkt, gibis numä ungärn zue,  
will mer's süsch no öpper nimmt

& wenn mi plan nid sötti ufgah, denn dreih mi um  
& ich weiss genau...

**denn fani eifach vo vorä a - irgendwiä wird's scho gah  
egal, wie wyt i gah muess  
eifach gnueg wyt wäg (gnueg wyt wäg, gnueg wyt wäg) vo diär**

ich will di nid betrügä, au wenn me seid, ich miechis gliich  
vom ghörä sägä lernt me lügä, s'gahd scho lang nümmä um dich

ich schpil so gärn monopoli & schpringä allne wyt voruus  
irgendwie laufsch so wyt vorn wieder hinnä drii  
& nur wer gäld hed chauft sich nones huus

wenn ich das schpili irgendwann verschtah, denn gangi wäg,  
la alles schtah...

## refrain

& hani au kei schtich gha, ha di gliich nid im schtich gla  
ich ha us diär en ängel gmacht & ha di gliich zum tüüfel gschickt

# summer

text: padi musig: bernhard



de winter isch vergässe - de früehling isch verbii  
jede tag isch no chli länger als är geschter no isch gsi  
und ich schwitz i minä schueh - i dem büroschtuehl

es juckt mi i de nase vo dem heu i de luft  
sunnecreme mit kokosnuss wird zu mim summerduft  
und us em radio singt e frau - vom „life, oh life“

**chumm, miär gönd a schtrand**  
**sunnä, wasser und sand**  
**chumm, äs isch sowit**  
**s'isch summer (summerferiä) summer (summerferiäzyt)**

alli mädels zeiged bei und decolltée und no chli meh  
und i dä badi ligged d'lüüt irgendwo am ne see  
und ich tauch is wasser i – s'cha nümm vill besser si

und alli sind irgendwie mit öppis schönem underwäx  
und alli schöne hend e schöni und hends schön mitenand  
& mis radio singt: „säg mer eifach nume no wieviu, säg wieviu,  
wieviu gisch mer wenn i chume“


## refrain

ich liggä da - ha grad nume mini badehose a  
und dänkä a all das schönä züügs, woni scho mit dier ha gha  
und mer ligged so chli da und i lueg di so chli a – und la d'zyt eifach schtah

und d'sunne brännt und nid nur mini huut wird langsam heiss  
s'vanilleglace lauft mer über d'hand, wo du zu mer seisch:  
s'isch summer (summerferiä) summer (summerferiäzyt)

# ha gmeint

text & musig: padi



ha gmeint ich müessi schtärbä und mis härz hed ufghört schlah  
wär ohni öppis z'sägä ganz plötzlich nümme da

und mi hätt mi denn begrabe imne wunderschöne grab  
mit bluemechränz im rägä, wo mi name druffä schtahd

**niemer weiss, wenn's zyt isch zum gah  
niemer weiss, wenn s'letschtä schtündli schlahd  
wenn de morgä nümme chunnt & de zeiger nümme dreiht  
wenn mä alles muess verlaa, bini froh, dass i di troffä ha**

wär gärn no einisch gsässe, det am see bi miär dehei  
hätt d'wält um mich vergässe, ganz wyt wäg mit diär elei

ich hätt gärä nomal glached und z'vill gha vom rote wy  
wär iitaucht det i das meer, won ich als chind schon drin gsi bi

## refrain

ich wärt furt bis früeh am morge, du hättsch barfuess tanzt mit miär  
hätt di agluegt und der gschwore: ich gang nümme wäg vo diär

## refrain

ha gmeint ich müessi schtärbä und s'sig alles scho verbii  
zum glück bin ich verwachtet und s'isch no nid sowyt gsi



# ich mag di nümme xeh

text: padi musig: bernhard



wenn du dänksch, es sig jetzt besser & du hoffsch, du sigisch in  
wenn du glaubsch, es heig sich gändret & es ligg jetzt no me drin  
du bisch immer no nid wiiter cho, nur will du furt gsi bisch  
nei, du chunnsch nümmä vil wiiter, will du doch dis beschtä

**hau ab - chumm schliich di furt, ich mag di nümme ha**  
**hau ab - wo du anetrampsch det wachst nü meh**  
**hau ab - besser wär's du würsch jetzt eifach ga**  
**hau ab - gang wäg - ich mag di nümmä xeh**

üsi wält wär so vil schöner, wärsch du nid mit üs hiä  
& ich glaub, es giengt mer besser, wenn ich dich nümm würdi gseh  
ich ha dich no niä gärn gha, doch du chasch gar nüd defür  
& wenn du bi miär lüütisch, stahsch eleigä vor dr tür

**hau ab - chumm schliich di furt, ich mag di nümme ha**  
**hau ab - wo du anetrampsch det wachst nü meh**  
**hau ab - besser wär's du würsch jetzt eifach ga**  
**hau ab - gang wäg - ich mag di nümmä xeh**

hei, ich gib dr jetzt en tipp & de choschtet dich gar nüd  
fründä lad me nid im schtich, doch ich weiss, das seid dr nüd  
ich wünsch dr schöni zyte, schick mer bitte nie e charte  
denn wenn du ändlich furt bisch, wird e keine uf dich warte

**hau ab - chumm schliich di furt, ich mag di nümme ha**  
**hau ab - wo du anetrampsch det wachst nü meh**  
**hau ab - besser wär's du würsch jetzt eifach ga**  
**hau ab - gang wäg - ich mag di nümmä xeh**

# übermorn

text: padi musig: sascha



mängisch wüssti scho no ganz gärn, was s'beschte für mich wär  
äs isch fasch so, als miechtet mir mis s'läbe schwär

ich vergisä halt scho - hie und da, was ich für laschter ha  
äs isch fasch so, als hätti die scho immer gha

doch eis weissi ganz genau...

**morn fangi villicht a - morn bini denn sowiit  
übermorn wird alles andersch  
morn wachi nämlich uf - morn isch äs ändlich zyt  
übermorn wird's nüm so si, wie's isch gsi**

s'gid sovil z'vill - uf dere wält und es gid nüd won üs würllich fählt  
und jede weiss, es dreiht sich immer nur um's gäld

und vor jedem - nüüä jahr sind alli vorsätz immer sunneklar  
und jede weiss, die wärded sowieso nid wahr

doch eis weissi ganz genau...

**morn fangi villicht a - morn bini denn sowiit  
übermorn wird alles andersch  
morn wachi nämlich uf - morn isch äs ändlich zyt  
übermorn wird's nüm so si, wie's isch gsi**

und weiss jetzt au nid, was miär de tag no vorem abig bringt  
weiss i eis ganz genau...

# s'cha nid si

text: padi musig: berni & markus  
*duett mit regula bauriedl*



du muesch mi nid go rette, äs isch scho längschtens alles gseid  
muesch für mich kei gäld verwette und zum gäh bini nümme bereit

s'isch alles so lang guet gsi, solange du alls vo mier hesch gha  
doch sit du gnueg vo mier hesch, lahsch du mich eifach hie im räge schtah

**s'cha nid si, dass du vergässe hesch, was mier zwe abgemacht hend**  
**s'cha nid si, dass du nümme weisch, was du versproche hesch**  
**s'cha nid si, dass dier das gliich isch, was mier üs gschwore hend**  
**s'cha nid si - nei, das glaub ich nid**

so mängisch simmer gfloge, ab und zue uf d'schnorre ghiit  
doch ich ha dich nie betroge und nid erscht sit du näb mer liisch

ich mag nümme länger warte, bis du dier ändlich sicher bisch  
setz nid alles uf ei charte, mier schpiled solange bis es fertig isch

**s'cha nid si, dass du vergässe hesch, was mier zwe abgemacht hend**  
**s'cha nid si, dass du nümme weisch, was du versproche hesch**  
**s'cha nid si, dass dier das gliich isch, was mier üs gschwore hend**  
**s'cha nid si - nei, das glaub ich nid**

# ich wett no meh

text & musig: padi



meitli, wenn du wüsstisch wie du mer de chopf vertreisch  
und s'wird mer plötzlich andersch, wenn du „hallo“ zu mer seisch

dis lache rettet miär de tag und dini auge ziehnd mi a  
s'git niemmer, wo so isch wie du isch, wett so gärn me vo dem ha

**ich wett no meh – uh , uh – ich wett no meh  
ich wett no meh vo der gseh  
ich wett no meh – uh, uh – ich wett no meh  
wett no vil meh vo der gseh**

ich bi gärn i diner nöchi und lueg di schtändig a  
und hoff, dass es nid gmerksch, wie sehr i uf di schtah

und wenn du mal nid da bisch, denn dänk ich immer nur a dich  
frag mi nid, werum's äso isch, das isch der wüirklich gliich

**ich wett no meh – uh , uh – ich wett no meh  
ich wett no meh vo der gseh  
ich wett no meh – uh, uh – ich wett no meh  
wett no vil meh vo der gseh**

weisch, all die schöne sache, wo mer zäme chönntet ha  
und mier würded alles mache, wär bloss di fründ nid da